



CHRISTIAN EDUCATION

October Events

Youth Day - 02
Pentecost Day - 16

*"Kapa theng eini pumkhat ihi bang a amaho jong pumkhat
ahitheina ding un, Nangman amahohi hong in"*

John 17:11

Meithai Nikho
Centre Church
Molnoi Area



Meithai Nikho
C/C Neihialveng



KBC Events "MEITHAI
NIKHO" muntin houbung
a akiman jing bang in
tukum in jong mun tin a
thilpeh leh tilkhau na ana
ki mang kit in ahi.

Meithai Nikho
B/C Zionveng



Meithai Nikho
B/C Zalenbung



CONTENTS

THUMAKAI HO

TULAIYA KUKITE KINOISENA/ <i>Editorial</i>	1
HAT INLANG HANG IN/ <i>Rev. Onkho Haokip</i>	3
Exam results hoi nading a panlah/ <i>Pastor. Letlal Haokip</i>	6
Thoudoh in salvah tan/ <i>Rev. Lunkhosei Tuboi</i>	10
MISSION FIELD VISIT	13
MEN DEPARTMENT REPORT	16
YOUTH DEPARTMENT	19
Christian EDUCATION	20
92nd Executive Council Report	22
Office le Gambih Thulhut ho	24

EDITORIAL BOARD

Chairman	: Rev. Tonglet Haokip, President KBC
Editor	: Dr. M. Thongkhosei Haokip, General Secretary
Joint Editor	: Rev. Lunkhosei Tuboi
Contributing Editors:	1. Rev. Thongkhohun Touthang 2. Rev. Lamkeng Lhouvum 3. Rev. Tongmang Haokip 4. Ms. Tingneihing Kipgen 5. Rev. T. Thangkhosei Haokip

Design & Layout - Hemkholen Haokip
Circular Manager - Ms. Vahboi Baite
Recorder Ms. Vahnunmem Haokip

THUSO LAHMAN

Church/Organisation/Department : Rs. 300/-
Individual : Rs. 200/- (Post a Rs. 250/-)
Indian Overseas Bank, Imphal Branch
A/C No. 073201000000350 IFSC No. IOBA0000732
The General Secretary,
Kuki Baptist Convention,
Opp. D.M. College, Imnphal 795001, Manipur
email: kbcindia@rediffmail.com

Advertisement bolnom hon Mobile No 8414919588
Circulation to kisai lam Mobile No. 8119030725 bolding



TULAIYA KUKITE KINOISENA

EDITORIAL

“Vo Jerusalem, nangma kasuhmil leh kakhut jetlam langthin umjeng hen! Nangma kageldoh louva ahile kadang chungka kalei behden jeng hen. Kakipa khongkheh gei sanga Jerusalem sangjao kagel lou leh! Psalms 137:5,6.

“Inlam nache phat teng le amaho henga nasei ding chu ahileh amaho jing (khonung) dingin keiho tuni kapetauve” (When you go home, tell them of us and say, for your tomorrow we gave our today).

Amasatah in muntina um Kuki Christian jouse ahideh a KBC member ho jouse chungka iPakaiyu Jesu Christa minin salaam kahin pecheh uve. Tulha asunga thupi Christian Themjilna lampang toh kisai chu ahin, ahideh a Teachers’Day (Sep.5) leh adang dang um hinajong le eiho nam mite a dinga lha poimo/suhmil thei hilou khat ahi. Hiche lha pumpi hi Black September anakisah in, nisism 13 nikhoi Sahnitni (Black Day) tin akihei. Ipi jeh a hiche lha le nikho kisah ham ti hi aneopen geiyin jong ahetsa le amil joulou khat chu ahitai. Israel te BC 597 le 538 kikh vel chun Babylon te henga sohchangin ana kitollun, hiche phat sunga agalmiten Zion la sahsah ding agot u le asah nom louvu ahi. Hijeh a chu chungka Bible chang itah doh u khu ahung hitai. Amaho dinga Jerusalem chu suhmil theilou ahi.



Eiho jong 1993 kuma kimang pan ahin, tukumhi kum 29 Ihinna ding chu ahitai. Imauva thudoh len khat chu: Hitobang nikhoho hi eiho Kuki Christian tia kiminvo hon iti ihetjing diu ham? ti hi ahi. KIM dinmun vang chu, thilse bolten kisihna le boldin-ga kilom abol tokah uva bol jing ding ahi atiuve. Eiho lah a hou lamkai khat le nin hiche hi Black ti sanga White tiding ahi atiuvin khat le khat chamna lampang joh a man dingin aseiyun aholleh chu ahi. Hiche chungchona anikho geldoh jing na dinga chu kimkhat in Hospital a Thisan (Blood) donate bol ding atiuve. Amaho gelin, 'hiche nikho hin mihon lungsetna beiyin eina that uvin, keihon vang miho ngailut na in ka thisan kapeuve' tina ahi atiuve. Hichehi gelthei tah khat chu hipontem? Hiche tilou lamchom choma jong aphalama geldohna thei um ding kinep ahi.

Japante jong akhopi niu (Hiroshima leh Nagasaki) America ten bomb alhahden uva mi asangsom asangja a athi keuvu hilouva hama puden khang ni khangthum geiya umden ahivangun amaho kilhaset (self-pity) leh phulah (revenge) bolnan akitil pouvin, themjilna leh natohna /lekha simna a kitahna ding le phat mandan thepna chuleh ngaidamnan akitil un ahileh Asia gama gam khangtou pen ahitauve. Eiho jong eidouho chung a phulah a thisan sokit sanga kitahna leh ngaidamna a phu ilah joh diuvin kigel lhau hite, hichun khantou-machaalna lampi ahi. Lampi dang ampoi. Lunglut tah a sim jouse chung a Pathen vangboh chang jing taken.





HAT INLANG HANG IN

Deuteronomy 31:6; Isaiah 41:10

Rev. Onkho Haokip

Pastor, Centre Church, Neihsial veng

SERMON/ARTICLE

Deuteronomy 31:6

"Hat jing uvin lang hang jing uvin, amaho khu kichah hih hel uvin, ging jong ging hih hel uvin; ijeh inem itileh nangma na kilhonpi jing jeng hi Pakai na Pathen, Ama ahijing nai; Aman na thonsah louhel ding da jong na dalhah lou hel ding ahi," ati.

Mose chu Israelte Egypt akon gamthip gam chan lamkai dinga ana kinganse ahin, Canaan gam alut diu phat a lamkai chom, Joshua tobang ngaicha ahitai. Hichun Pathen in Joshua le mite henga akil-amkai ding dan'u thumopna ana nei ahi. Pathen akon'a nganse-na kicheh nei lamkaiho in Pathen akon'a hansanna le hatna chule Ama umpina kicheh tah anei jiu ahi. Pathen in mi akouva ngansena apeh a chule alhonpi thei lamkai kitihi thupi le mantam ahi.

Israelte in mailam a akimaitopi diu Jericho, Ai chule khopi le leng tamtah um ahijeh a Pakai akon hatna le hansanna ngaicha ahi. Lhahsam jeh'a hansana dinga kitilna ahipon, kimaitopi dingho let jeh joh ahi. Pathen in mihemte adinmun cheh uva hangsan tah'a ana tong dinga adei ahi. Pathen angunga din jangkei masat ding chujouleh Satan toh kidintena'a hangsantah a dinjangkei ding ahi. Pathen ngansenaho boldoh hi tahsanna galsat ahi (1 Tim. 6:12).

Mihem in vangam angai behseh jeh a leisetna Pathen in angansen-aho asuhmil ding ahipoi. Leiset angailut behseh jeh a vangam'a adinmun ding akisuhmil ding jong ahideh poi. Eihon leisetna gal isat uhi vangam ilhun teng uleh kipaman isanna ding'u ahi. Itih tah leh boina ahung lhun ding kihelou ahi jeh a nitin'a hat jing ngai ahi. Paul chun lhaitet golseh asehchai theina ding a hat tah le hangsan tah chule gentheina tintang ana thoh ase in ahi (2 Timothy 4:7).

Hiche leisetna hinkho imannauva hin hatmo le meidoi thei ihipouve. Mijouse in nikho jouse hi nikho pha ahiding akidei cheh in, ahinlah hichu ahi jing jipoi. Eiho tahsaphe le thisan toh kibon hilouva Satan

le anungjuho toh kibon ihiuvin, ihat jing'u ngai ahi (Ephesians 6:12). Hinkhoa thilse ahung lhun tengleh lhagaova lhahsam ding; hinkhoa thilpha ahung lhun tengleh lhagaova hatdoh kitji ding ahipon phat jousea Pathen a kisuhhat'a hansen ding ahi.

Israelte dinga Manna chu gamthip gam'a neh dinga kipe anahi jongleh Canaan gam'a neh ding hilou ahi. Pathen in Israelte chu gamtep gam alhun theina ding uva gamthip gam'a phattheina ana pehu ahi. Pathen thilpeh phattheina ineihouhi Pathen tepna vangam lhunna dinga eikipeu ahi. Pathen thilpeh phattheina le Pathen tepna gam na hetkhen louleh Pathen thilpeh (manna) a na pum ngolden a Pathen tepna (Canaan) gam lhunlelna a na neilo thei ahi. Israelte chun Gamthip gam'a kum 40 sunga an baisa le hon minsa ana neh-u ahin, Canaan gam avang amahon akihon dinggu ahitai. Pathen in achate chu gamthip gam le gamtep gam'a anneh apeh dan kibang lou ahi. Naosen apilhin ding tengleh noitwi angol banga Israelte jong apilhin ding tahjeh uva Pathen in avahnau Manna chu asuhhai ding ahitai. Gamtep gam chu nang dinga gotsa ahin nang na hansen ding bou vat ahi. Gam-

tep gam na lhun koncha hita maithei ahi.

Pathen tahsanna inei jeng seh u hilouva Pathen in eipeh u boltheina ineihou jong ikitahsan'u ngai ahi. Na lhunna ding mun (gamtep gam) na lhunna ding in boltheina le seitheina chule sumlepai tampi na nei tei tei angai pon ahi. Samson chu amelmate in tha dinga ana umkim vel uchun amakom'a Chemjam, Tengcha, Meithal le Bomb imacha ana umpon, aman amaiphah pen chu Sanggan khagu bou anahi. Hichu hangsan tah a ana manchah bou ahi.

David in Goliath ana kimaitopi chun akhut achun songchang chang nga le gophel bou ana kichoi in ahi. Hatna le letna chule galsatna lam'a sei ding in Goliath chu ahathjo, alenjo le athemjo ahi, ahinlah Pathen ang'a hat le hangsan chu David joh anahi. Eima mitvet a ineilouho jouse Pathen kom'a thum thum sang in Pathen in eipeh hatna, boltheina le seitheinaho joh phatea kisemtup a galjona le hindohna a nei ding hi athupijo le lolhinnajoh hiding ahi.

Mose in tenggol khat ana neiyin hiche chu Pathen angunga

hat tah le hangsan tah'a aman-
chah jeh in kihuhdohna le gal-
jona in ananei in ahi. Na khut
le na hinkhoa sumlepai tampi
na nei angaipon, na tahsa jong
lenta aphah tei tei angaipon,
na chihna le na thepna jong
asan tei angaipoi, na mel jong
ahoi tei tei angai pon, amavang
na neikham kham achu hang-
san tah'a na pan leh Pathen jal
a na lolhin'a gamtep gam na
lhun thei ding bou ahi.

Pathen in thil neocha cha mang

cha'a melma lentah tahho le
boina lentahtahho akon'a gal-
jona le kihinsona eipeh theiyu
ahi. Eima hinkhoa aumlou le in-
eilouho seisei sang in aumsese
Pathen hatna songa manchah
thei ding hi thilpha ahi. Hichena
ding chun hat inlang hang in,
Pakai Pathen chun na hin pan-
pi tengleh na na lhunna ding
mun na lhun a chule na tup le
doihoa na lolhin ding ahi. Hat
inlang hang in, Pakai Pathen in
na lhonpi jing nai. Amen!



TAHSAN TUILUT



Kuki Baptist Convention Gambih 20 a um Bongli Baptist Church a Pasal 7 chule numei 1 in Christa atahsan nau aphon doh dungjuivinin Pakai Lhacha Gambih Pastor Seiboi Haokip in A Pa Pathen, Chapa Pathen chule Lhagaotheng Pathen min in tuilutsah na anei tai.

Exam results hoi nading a panlahkhom ngai.

Genesis 1:28

*Pastor. Letlal Haokip,
Delhi*

SERMON/ARTICLE

Leiset a nu le pa in aboipi pen khat chu ahile, chanei jousen school kaisah akum lhun tengle exam anei uva hiche result chu kingah sohkei ahi. Amabou exam result ahung so tengle mimal, insung, school le so-ciety akipah le akipah lou akium jui'in ahi. Chateho lolhinna le leiset a aum lai seuva tahsa le Lhagao a hinkho phatah a aman nadiu uva chu "Education" hi thupipen khat ahi.

Gam khangtou ho Singapore, Europe, America lah chu thu khát ahitan eiho India adeh a eimiteho ding ahi "Education" hi Chihna, hetna sangtah holna ding phat ahi naipon. Eimiteho ding a lekha sim athupipen na khat chu ahile leiset a damlai sung'a neh le chah ding gelna a service amu diu chu tup thupipen ahi.

Nu le pa, loi le pai, houbung le khosung lamkaihon jong igel diu a dei umchu ahile; lolhinna hi mark sangtah a kinga ahidehpoi e. Amabou Class X le Class XII a mark akingaichat na lopen chu ahile subject adeh a science or commerce alah nom uva ahile mark hoichu hungngai ahi.

Chateho hoihi Pathen in talent apeh a lekha hethei loi ahilou le ama le ama kiboipi jong um nante. Amabou atamjo hi Class X le XII a mark hoideu amu nadiu ahi, nu le pa, houbung, le khosung lamkaiho boipi a ikitho khom a chateho lekhasim nading a environment chu sempih ngai loi um ahi. Hiche nading a keima lunggel phabep aum in ahi.

TAONA POIMO PEN: Khatna ahile nu le pa, chateho, houbung mipiteho jouse chateho lolhinna ding ahi taona a ipan u ngai ahi. Tanti neilouvin taojingun (1 Thessalonica 5:17). Imacha lungkhamna nei hihhelun; ahin imalam jouse-a taonale thumna mangin, thangvah toh thon, nathum jouseu chu Pathen hetsah-un. Chutengle Pathen lungmonna, hetna jouse khokhel sohkeija chun, nalungu le nalungthimu Christa Jesu'a ahon ding ahi (Phil 4:6-7). Jacob/ James lekha a kimu chu ahile, " Pathen kom naijun, chutile Ama nangho kom hung nai ding ahi." Sopiteho, chateho lolhinna ding in nu le pa, insung miteho, houbung mitehon Pakai kom nei uhitin Pathen komma thum jing uhite. NU LE PA CHUNG'A KHA NGAP AHI: Chateho Class X le XII a mark sangtah mu nading ahi nu le pa chung a kihangap ahi. Eimite hi nu



le pateho (Nu le pa service bol'a posting lele hochu thu khát ahitan) hin chateho Lhagao le lekha sim hi thupi in akigel beh pon ahi. Nu le pan chateho hi inn a umpi'a, toup'i'a, lekha simphat a neh le chah ngaito piding. Ahilou a ahile tuition gathah ding, school ahung lhun teng kihoupi a school kai nopnam tiho doh ngai ahi in, eihon akibol behpon ahi. Tuition kai nading ahi eiman jong thah thei ahi in amabou thah sangin cycle or bike, scooty akichoh pihin. Nu le pa gel'a school admit obol'a, tuition ilah sah a ahile eikin kichai ahitai ti'a gelloi jong tamtah kium ahi.

Nu le pa hin ahithe i a ahile sum le pai senglou ajong chatehohi exam a mark sangtah a lolhinsah thei ahi. Hiche nading achu chateho hi discipline le time management/ phatman dan athep ngai u ahi. Chatehon nu le pa aum lou teng ule lekha sim a phat man sangin TV, mobile, internate a phat amang jo jui tavin ahi. Nu le pa tamtah hin chateho umlam helou a kholai leng leng jehuva phat mangjong aum kitin ahi. Chatehon discipline le time management anei nadiu uva chu amasa pen ahi nu le pa hi exemplary(vetton) thei hingai ahi. Nu le pa atamjo gel ahi tuition isol a ahile ahijeng e ti lunggel nei akitam jeh jong ahi. Tuition chu solngai ahi amabou tuition a kihil lou tampi inn a kihil theiho hi aum thei tahlou jeh'a chateho boi tamtah umlo ahi. Solchah Paul in Thessalonica houbung miteho atil khou-na khu ahile; kitil khou ding, tosot ding, kithopi ding, chate hijong le

thilpha bolding, kipasah jing ding, thangvah toh tho a taopih jing ding khu nu le pa kin thupi pen khat ahi.

HOUBUNG JONG PANNGAI AHI CHATEHO LOLHIN NADING AHI:

"Houbung" jong pan alah ngai ahi. Kum 20/30 masang chu thu khát ahitan. Tukhang ahi competition sang ahitah jeh ahi chateho tahsa le Lhagao a machalna le lolhinna ahin nei nading ahi nu le pa keu hithei talou ahi. Houbung injong pan ahalah ngai ahitai. Iti alah ding ham iti a ahile; activities aneiho hi ahithe i chan a lhomsah ding. Vetsahnan, khompi hohi kum 4/5 sung ahi khat nei ding. Kum khat kum ni sung a khompi 2/ 3 neilou ding. Ajeh chu khompi atam chan a chateho lekha sim asuhboi ahi. Ahithe i a ahile adeh a town le city ahi houin jong Sunday ni bou'a kai'a hicheni hi phatah a manding. Nute, pate, chateho hi Sunday ni bou'a kikhop ding. Weekday achu Sunday sun a Bible Study khu Wednesday or Thursday jan a neiding. Adangse hi ahithe i a ahile nu le pa innsung a um a chateho vetsui/ vetkol a "Innsung Maicham" niseh le sempih ding. Thinglhang akon a chateho lekha sim a hunggho chu ahithe i a ahile aum namun uva "Houinn" a enrol diu, chule houbung lamkaiho chun amaho chu ipiti lampang a boipi ding ham chu agel diu. Gam khangtou ho ahi hiti achu min abol ahitai. Houinn hi sun nilhum a kihong a adeh a jingkah ahi min houinn a

taona aman u ahi.

PAKAI LHACHA HON IHET DIU
CHU INNSUNG HI MISSION
FIELD NO 1:

Houbung lamkai, Pastor, Evangelist honjong ahithe i chan a inn visit a sum le pai holhi habol lou ding. Ibol a ahijong le phatman dan hi thepngai ahi.

Pastor pun damlou, birthday, anniversary, counselling anei a ahile pastornu chu inn a akium a Pathen in gou afeh chateho chu Lhagao le lekhasim le thil abolho boipi a "Innsung Maicham" sempih ding chu akin thupipen khat ahi ngai'e. Eiho hi Pastorpun ajite akipui val jehuva chateho tamtah hi setna chu phatnan ajo ding dol ahin amabou phatna chu setna in ajohi akitam tan ahi.

Adeh a hou natong chateho hi. Nu le pa umpi talou ahi jehuva. Delhi Kuki Worship Service a na kahin tohpan hin inn visit ding kati a ahile gollhang khat chun "heu keiho nahung boipi sangin amasan hou natong chateho" naboipi a phalou ham ahin tin ahi. Adih nakhat jong um a ahi.

KHANGLAI KAIKHOM HI JAN
A UMSAH LOU DING: Khanglai kaikhom hi Sunday a bolding. Laajil, meeting hohi Sunday mama a chai a ahithe i a ahile weekday ahi program ima gotlou ding. Khangthah lamkai honjong thil dang2 sang a khanglai ho lekhasim le Lhagao lampanghi haboipi a adangho hi secondary a koi ngai ahi.

KHOSUNG LAMKAI HONJONG

CHATEHO LOLHINNA DING AHI
PANLAHNGAI:

Khosung lamkai honjong ahithe i chang a khosung khangtou nale machal nading chu chatého chung mama a kingam ahitoh kilhon a khosung a "chateho lekhasimho ading ahi dansem ngai ahi." Dan sempih toh kilhon a athanop nadiu ahi "Kipaman" jong sempeh ngai ahi. Officers, sports them, NGOs, teachers, etc hohi kou'a seminar le counselling neipih sah ngai ahi.

Houbung keu hilou a khosung lamkai honjong chateho lekha sim hohi kum khat le khatvei nivei kimupi a nekhkompi a tilkhohu ngai ahi.

SIMLAI KILHOIKHOM HOJONG
HAPAN NGAI U AHI: Simlai Kilohom honjong ahithe i a ahile sports meet ho hi athanom, abolthei, sum le pai neiho moh bolbol sahlou ding ahi. Hiche sang a areas ahi kum khat le khatvei tournament neipi a ahithe i a ahile hiche tengle club le Gouvernement lang a sports incharge hotoh kihou selection jong bolsah theipei a tournament got ngai ahi. Simlai kilhoikhom hon Houbung le Khosung club hotoh kihou-toh a sports meet vetsahna'a "Gospel Olympic or khosung Sports Meet" hohi bol sahthe i dale phante. Ajeh chu chapangho lekha sim asuhboi l'heh ahi. Sports meet/ tournament atamval jeh ahi chateho tamtah setlo keu hilou'a mi tamtah midoh ding a kineppi hojong phatman le discipline hinkho anei theilou jehuva



career kichai a lekhasim career se tamtah kinei ahi.

Ipi kisei jongle chateho chung a kinga thou thou ahi. Chatehon jong lekha sim thanop le lunglut nading ahi panlah ngai u ahi. Lekhasim nading atmosphere le environnement ahoi nading ahi nu le pa, houbung, khosung, Simlai kiloikhomho in pan alah ngai ahi. Ahithe i a ahile taona toh thon pan lakhom uhite mimal, innsung, houbung, khosung le Pathen lenggam amachal nading in kipahtah le kitoh tahin sum le pai, tha le jung hohi sekhom uhitin chateho

lolhinna ding ahi. Hiche keu hilou in nu le pa, houbung, khosung, Simlai kiloikhom honjong "School neiho hi" kipapi a tilkhoh a support bol-ngai ahi e.

Pathen in asim jouse phatthei hinboh henlang "Chateho lekhasim" nalam a machalna le khandou nading in pan nahinlah bediu chu kakinepna le kataona ahi.

Kakipah e.

Pathen in ikiloikhom nao Kuki Baptist Convention phatthei boh jing tachen.



Chikim Baptist Church mun a Gambih No 15 An ngol Taona



Gambih No 15 An ngol Taona Chikim Baptist Church mun a Mi 235 in lunglut tai in taokhom na akinei in Speaker in Rev Hemlun apang in lolhing tah in akichai tai.

Thoudoh in salvah tan

Bible Text: Isaiah 60:1

Rev. Lunkhosei Tuiboi

Secretary, Youth Department, KBC

SERMON/ARTICLE

Khangthah hinkho man na a apoimo pen le chepi tei dia phapen chu ahile pil na hinkho kiti hi poimo ten din kagellin ahi. Tulai tahsa lam hinkho man na a Nu le Pa ten Khangthah, khangdong ho chung'a thucheng aha man pen uchu ahile, Thoudoh in ti hi aha man pen diu katahsan in ahi, ajeh chu jing imu, jing thou joulou khang thah tam tina hiding ginchat ahie.

Thoudoh in salvah tan kiti thupi hi KBC Youth Department in 2022 Kum thupi a kimang ahito kilhon in tunin khangthah te kitil khou thei nadin noiya hin themkhat tah lang na kahin nei jin ahi.

1. Imut na a kon na Thodoh phat ahitai

Thoudoh in kiti hi a imu nalai ho kisei na ahin, atoh ding atham ding tamtah don louva nop satah a kichol na phat na mang ho khu kisei na ahin ahi. Khangdong khat na dia malam a toh ding tamtah aum e tina ahi. Kinon moh um hih in nache nading lamsao tah aum nalaije, natosh ding, nabol ding jong tamtah aum nalaije tina in kasei nom in ahi. Ajeh chu khangdong khat hinkho chun bol ding tampi anei ahin, akhangdon sung'a abol dialom ho akibol doh man louva ahile ama a dia khonung chan na vaigei na, chule lhahsam nale lhinele na tampi anei lo bep ding chu ahie.

Lhagao lam hinkho thudol a kasei nom chu ahile, Lhagao va pentah na hinkho mang louva, alhagao hinkho ding gelkhoh lou, adeh a atonsot hinkho adia kigel khoh na nei lou ho chu Lhagao va imu nalai ahiuvin hiche chun khangdong ho lhagao tamtah tonsot thina a apui lut nadia het doh na nei nai lou ho ako mun in ahi. Ajeh chu Lhagao hinkho thudol a jong Khangdong khat chun a toh ding tampi anei ja donse lou va akoi ding chu dih lou ahi. Ajeh chu khangdon lai hinkho hin masang lampi sao tah a jot pa nalai ding ahijeh chun aphatcha a na atoh pat na ahile tamtah atoh doh ding tina ahie.



Tulai jin khangdong khat in abol ding atoh ding ho don talouva alup na mun na um-den na Mobile phone na kisa boija Lhagao dou na thu le chonthang hoi na limvet ho a lunglut mi tampi aum tan ahi. Hiche phat chu dalhah a Lhagao hinkho khomu na chu khoh sah ding hi apoimo pen in ahi.

2. Salvah ding'a Kouna:

Khangthah/Khangdong ho hi vah tabang limput pu le mel pu chu ihiu vin ahi, tohlel tham-lel namun jouse le ahahsa lai mun jouse a jong kimin phah jing chu khandon lai hinkho hi ahipen in ahi. Hinlah vangset um tah in tulai Christian hinkho kiman khel jeh in, khangdong mitampi hi kham nathei jin ahen tang tao vin chule Pathen mi lungset na hong sung akon in jong apui mang gam tao vin ahi, Hiche hi ivet na ahile alhasam ho alhinglail ho kaithou ding le suhal ding'a um jing ding chu khangdong te hohi mopoh na lent ah chang chu ihiuvin ahi. Hijeh chun anguisa, alhasam sa, alhing lel sa, Lhagao va mangthai ho, adeh a muthim natoh na a hinkho mang ho salvah ding le ga pui doh dia chu mopoh na le negnse na chang ihiu ahi ti suhmil lou ding ahi. Hijeh chun thoudoh u hitin muthim gam chu salvah u hite.

3. Minun Mipan chanupha chapa pha adei cheh un ahi.

Proverbs 23:24

Midih chu apa nasa tah a kipah thanom ding ahin, Chapa chingtah kihinpa jong achunga kipah ding ahi.

Tulai chapha kihin doh minu mipa lhomcha bou aum tan ahi, chapa ching nei mipa lungthim sung a nui nale kipa na jeng aput doh thei jin, Ahingpa apa adia mantam tah chapa pha chun apa minthan nale loupe ding mun jouse'a asem doh pih jin apa lungthim asudam lheh jeng jin ahi.

Chapa ngol in vang apa jum nale jachat na asem doh pih keu hilou vin lungthim kichol man lou le kipah man lou vin akoijin, apa lujang'a jum nale jachat na akhuh lhah pih jin ahi. Tulai khang dong ten ipi chu i-dei u va ipi chu i-tup u ham? Khangdon lai hinkho kiti hi ihung lhanglhah lang teng le ineh ding ichah ding kikhol tup na phat ahi ti hi, hetdoh lou khoh ahie. Tun Nanu le Napa um lou na, gampam le gamthip chule mun a ong lai² jah hinkho nom i-mang uvin, koima um lou na mun na thilse le apha lou² bol nading jeng bouva i-kilhen uhi, khonung a i-hung ka nading u le i-kisih na diu ahi hi igel doh lou u ham?

Itih a nanu leh napan kham

nathei ho le, agu nei, nakhang-don lai suchul ding kham nathei ho neding le don dia natilkhon khah uva, ahilou le aguh le agal a chonchat vei na hinkho mang dia natil khon khah uvem? Koiham achanu achapa, a-jong ding le chonchat vain a hinkho mang dia thuhil kha minu mipa um in tem. Um lou hel ding kaging chan ahi, hiche malah chu nanu le napan na chondih nading jeng bou vin na hinkhon khah jing un te ti tahsan na alen l'heh jeng in ahi.

Tun nanu le napa akon zalending dei l'heh jong le chun nikho khat le nanu le napa mama lhangaija nahung ka thou² ding nikho hung lhung ding ahi, tunia nanu napa damlai pet hin akipa nalhon ding joh nathan ajalai chan in bolpih go jo in chuti le hinkho jong sot pi hing thei jin natin, chukit le thilpha tamtah jong na kilamdoh thei joh ding ahie.

Nanu le Napa lungthim nat nale l'hisu naho hi khonung teng le nathoh jou ding hina a tunia nang in hibanga hi nop-sah na nahiti holtho jeng hitam?

Nikho khat le nangjong minu mipa nahung hiding hi nakihet lou ngap ham? Nahinkho man

hi phaten kivet tem in nung le naki sih nading jeng le naka ka nading jeng bou nakilam doh jinge.

Chapa ching/ Chanu ching ho hoilaija ba um hitaovem, minu mipa tamtah hesoh le genthei jin akap le le gamtao ve, achanu teu achapa teu akihol mo un panpi ding in asam sam tao vin ahi, khangdong tamtah satan hankol kai namun na a oh den un thabeijin aum gamtaove tin minu mipa te akap kap tao vin ahi.

Vo khangdong nang beh in napa le nanu kipa nading hinkho naman lou lai ding ham? Nakitah na hoija naki man sah a na melhoi na kon na suh chul pih hitam, tunin nalungthim imut na le ngol na akon in hung jamdoh loijin achu ti lou le nachunga l'hitui long l'hading hi atam beh set jeng tan ahi.

Achainan: Tu hi imut phat ahinai poi, kichol du nading phat jong ahinai poi, hijeh chun thoudoh u hitin, salvah u hite, igamsung uva Pakai kipa nathei thupha le thuhoi, ichonao ilam lhah nao jouse hi vechen u hitin, hangtah le pontho tah in muthim gam hi sal vah tao hite.





MISSION FIELD VISIT

*Rev. Lamkeng Lhouvum,
Mission Secretary*

Mission Column

1. Rev Brojen Meitei KBC Missionary a dia thenso hita:

Rev Brojen hi KBC in Ordained anabol Pakai lhacha khat ahin, hijong leh phat sottah hi natong khom thei louvin ana kiumin ahi. Tuhin Pathen thilgon hintin achesa nikho 31st July 2022n nikho Sunday ni chun Pathen natong khom dingin Thenso leh lhandoh ahitai. Pathen thangvah in um hen. Rev Brojen hin Loitang Leikinthabi Baptist Church a Pastor ahin Pathen manchah Pakai lhacha khat ahi. Ama lamkai naloija hin Meitei Mission field a hin Mission field Fellowship 4 jong hon doh ahitan ahi. Houbung miten taona a geldoh jingo hite.

2. Meitei Baptist Church Soibam Leikai Houin thua Meeting:

Meitei Baptist Church Soibam Leikai hi Tribal Colony komá um Houbung khat ahi. Tribal Colony Imphal hi Government toh gon na noija Multi-Purpose Government Residential Quarter sah ding tohgon aum tah jeh in Tribal Colony Eviction akibol tan hiche a hin Meitei Baptist Church jong Eviction hung kibol din aumtan lainat umtah ahi. Ijem tia Eviction ahung kibol khah tah jong leh apha jo cheh khat sah doh lam doh ahi thei nadin Taona a gel doh jingo hite.

3. Elijah Prayer Mountain Main Sanctuary kisa machal jinge.

Pathen lungset in Elijah Prayer Mountain Main Sanctuary kisa ama chal jingin ahi. Hiche a dingá hin Sopi mi phabep khat in jong Window, Kotkhah chuleh Tile semna dinga kipehna hin nei ijat ham khat ahung um thei tan kipa thu sangtah in kahin phongin ahi. Ipi hijong leh hiche Main Sanctuary hi aphant cha sah chaiya aum thein a dingin Houbung mite taona a guchu tah in pang jingo hite.

4. Missionary ho Taokhoma Elijah Prayer Mountain

Nisim 16th August 2022 nikho chun KBC Missionary ho Taokhoma Elijah Prayer Mountain a akineijin ahi. Hiche nikho hin Pi Kimneo Hangsing Hon'ble MLA Saikul leh Pu Letzamang Haokip Hon'ble MLA Henglep ho jong pan ahung laovin ahi. Hiche kin gona hin Rev Dr. M. Thongkhosei Haokip in blessing Prayer ja umtah MLA teni ana neipeh in ahi.

5. Bikaram in neipi Mrs. Chouba Taopehna:

Loitang Leikin Thabi Church Founder pa Mounu Mrs. Chouba Meitei kum 41, ama hi Pu Bikham in neipi ahi. Ama tahsa damona Kidney fail ahitan nisim 20th August 2022 nikho a Chandigarh a Kidney Transplant a dinga akal sona dingá KBC Mission office a konin vilna leh tao pehna Missionaries ho leh Evangelist hon akinei peh in ahi. Hiche a adam lounu hi kipa umtah in, Pu Lalboi Haokip Chief of T. Champhai KBC No. & Family ten Rs, 5000/ a kithopina aneijun ahi. Houbung mit-en ahung dam doh na dingin tao peh u hite.

6. Missionary Bijay Chanu Mel hoitah khat neita.:

KBC Chingmeeirong Mission Field Pakai Lhacha Pu Bijay Gatani chun ache sa nikho phabep masanga RIMS Hospitalá Chanu melhoitah anei lhontai. Amani chanu alenu Birthday Nisim 19th August 2022 nikho chun akimangin chuleh Nao dop An nekhom jong akineitan ahi. Pathen in insung phat thei boh jing jing taken.

7. Pastor Paolam Kipgen KBC No 7 Pastor dia cheta:

Tumasangá Pheidinga Mission Field a um Pastor Paolam kipgen chu KBC Gambih No. 7 Pastor din achetan ahi. Ama hi tu masanga chu Pheidinga Mission Field um ahin , hinlah Pastor Post aong aum tah jeh a chu Convention Executive Committee gontoh na dung juija ama hi kisol ahitai. Hiche toh kilhona chun nisim 20th August 2022 nikho chun Gambih Centre New Kelthelmanbia thah lut ahitai.

8. Rev Helien Singsit & ai neipi Mary Singsit Thailand Missionary dia lhandoh hita.:



Serving in Mission (SIM) Ministry noiija dingá KBC toh Partnership a Mission natoh khomna khat a dia Rev Helien Singsit leh ain neipi Mary



Thailand Missionary khat din thenso ahitai. Nisim 27th August 2022 nikho chun KBC Mission Board ho leh Imphal Area Missionaries ho toh KBC Office muná hiche kin chu lolhing tah in akichaitan ahi.

Hiche Commissioning Service kin pi chu Rev Lamkeng Lhouvum in amangin chuleh Rev Helien Singsit leh Rev Hiakiie Hegui Director Serving in Mission North East India in Houlimna amang Ihonin ahi. Pathen in Rev Helien Singsit and family phat thei boh jing taken.

Sarang Baptist Church le Aishi Baptist Church a TAHSAN TUILUT NA



Pathen lungset najallin achesa nisim 1 july leh 3 july 2022 nikhon nin Rev Jamminlun Gambih Pastor KBC No. 12 khut a, Sarang Baptist Church leh Aishi Baptist Church mun'a chate mi 18 (Sarang Baptist Church mi 9 le Aishi Baptist Church mi 9) Pa Pathen, Chapa Jesu Christa Pathen, chuleh Lhagao Theng Pathen min'in twilut na ana nei in ahi. Pathen in KBC phatthei boh jom jing taken.

MEN DEPARTMENT REPORT

Rev. Tongmang Haokip
Men Department Secretary

Men Column

Pakai lenggamma tohkhompi Houbung mithengte jouse nabonchao-
vin huhhingpu Jesu Christa min in kangai lutnao salam kahinboluve.
Houbung mithengte taonaho jalle Pathen lungsetna jalin tuni chan gei-
ja Convention Men Department jong khantounale machal na amano-
jing theijeh in hatchung nung pathen kathang vahe.

Convention Men Department tohgonna noiya Gambih levela Pate
Camp boldinga kigong chu achesa Dt 26—30 July 2022 sungin Gam-
bih NO. 7 Sajal Baptist Church munna Gambih Pate Camp ana kibolin
pathen lungsetna jalin lolhingtah in Camp anakichaijin pathen kath-



angvahe. Hiche PateCamp mahin Rev. Onkho Haokip le Rev Tong-
mang Haokip Scretary Men Department KBC Speakerinanapang Ihon
in Rev Mangkholen kipgen Camp Dirctor nin apangin Ng Lhingnei-
chongpathen vahchoina langeitah san anapangin ahi.

Hiche pate Camp ma hin Gamsung mipate thanom tah in ahungpan-
gun upa lhingset cheh mi 178 (jakhatle somsgale get) ahung pangun
amaho jalin pathen kathangvahe. Pate Campma chun kum70 (somsa-
gi) chunglam hungpangho chungsa kipathu akiseijin chule adongpen
mikhat, pa Mangchunga amaho changhi kipaman in Envelop neochao
chajong jong akipeovin ahi.

Amaho chu (1) Pu Paoneh Haokip kum 82. (2) Pu Helkhogin Haokip
kum 78. (3) Pu Letgin kum 77. (4) Pu Janghem kum 75 (5) Pu Jamsei
Haokip kum 72 (5) Pu Seimang kipgen kum 71 chule a kum adongpen
(6) Pa Mangchunga kipgen adongpen kum 22 ahi.



Hiche pate Camp lolhin nadinga pan hinlaho:-

(1) Leplen Baptist Church Gambih No.2 Camp sunga jingkah nilhah oivasetna annehding chang tin 120 (jakhatle somni) ahintohun Angchahng lhingsetin Camp sunga emacha kivat louin Camp akichaijin Convention Men Department thalhengin kipana sangtah kahin phonge

(2) S. Molcham Baptist Church Gambih NO.8 in Rs 10.000(sang-som) chule

(3) T.Champhai Baptist Church Gambih NO. 8 in jong Rs 5.000(sangnga) kiphal taha pakai minna ahintodoh jehun achung chehuva kipana seijoulou kahin phonge.

(4) Rev. Lamkeng Lhouvum Secretary M/E KBC Camp phatsungin eihung vilun in Suger Kg 3 le Everyday kg 2 chule chapati ahintohun tilkhoun na jong eihung neijun seijou louvin amale insung mite chung a kipathu sangtah in kahin phonge.

(5). Pate Camp sunga nehding Lengthei pum 250 (janile somnga) L. Jangnomphai Baptist Church NO.7. Nuten eihung tahphehun achungu-va kipana seijoulou kahinphonge.

Pate Camp lolhina dinga Camperho dinga jingkah nilhah sunna meikhule nisanoija ngailutna jala Anneh tuidon aphatcha eisempeh jingu akhonei Houbung mite chung a jong kipana seijoulou kahinphonge pathen in phatthei boh jing taohen.

Lom Resource Centre (LRC) nakitongho :-

(1) Pathen lungsetna jal in Lom Resource Centre munna na kitongho jong amachal jingin ahi. Achesa 18th August Thursday 2022 nin Zalengbung Baptist Church Gambih NO.3 Pate mi 32 (somthumle ni) pakai min in thanom tah in jingkah matahin naatongin ahungkonun jing Anjong amunna kihonding Angchang chule meding jong lhingsei in Gari Car 4(li) le ECO-Van 2(ni) gomma Gari 6 (gup) ahung kitolon nalentah ahung tongdohun achunguva kipana seijou lou kahinphonge pathen in Zalenbung Men Department le agariho jong phatthei bohtahen.

(2) Dt 25th August 2022 (Thursday) nin Gambih NO. 4 Men Work Committee ahungkonun Lampi a song Balusinger(songneo) akisungin ahi. Hiche nia natongho 1.Pu Seikhohao Vaiphei President Men Department KBC .2. Pu Jangthang Mate Chassad Avenue 3. Donghen Haokip Chairman NO4. 4.Pu Hethong Kipgen Secretary NO.4. 5.Paothong Haokip MWC NO.4. 6.Pu Paojang Haokip MWC NO.4. 7. Pu Lalsei Chongloi 8. Pu Thongsei Haokip Chawkider 9.Rev Tongmang Haokip Secretary KBC.



(3) Dt 26th August 2022(Friday) ni Gambih N0.23 Men Work Committeho ahung konun nalen tah ahung tongdohun chunguva kipathu sangtah in ahung kiphonge pathen in phatthei bohjing taken, natonga hung konho:- 1. Pa. Khaitinlen Kipgen Chairman N0. 23. 2. Pa. Mangsat kipgen Scetary N0.23 3. Pa. Thangmang Haokip MWC 4. Pa. Lunkhothang Haokip MWC 5. Pa. Thonsei Haokip Chawkidar amaho jalin pathen kathang vahin ahi. Gambih Men Department hihenlang koi Houbung Men Department hijongle amaho banga pakai minna Lom Resource Centre munna natongdinga hungho jouse chungu kipa thu akiseijinge.



YOUTH DEPARTMENT

*Rev. Lunkhosei Tuboi,
Secretary, Youth*

Youth Column

Bible Quest thu a hetssh na:

Pakai Jesu Christa jalla kangailut KBC Gambih le Centre Church a um Houbung mitheng te ho jouse nabon chao vin Jesu Christa min in kangailut nao salam kahin pe cheh uve.

Kumsih le KBC Youth Department te tohgon nanaija ina bol jing u Bible Quest hi tukum teng jong le ahung lhung ding Nisim 16th October 2022 leh Exam Center a ina man nao mun jouse'a achu Exam ibol kit diu ahijeh in noiya hung ki tah lang ho hi phatah a ina vet cheh uva chule Exam a jong pan ina lah cheh diu vin Pakai min in kahin tem cheh un ahi.

Chule Ahung lhung ding Nisim 16th October 2022 nikho hi KBC Bible Quest nikho ahijeh in Houbung sung'a Program ho in agon lou diu vin jong Pakai min in tem na le hetsah na kahin neicheh uve.

Bible Quest Portion:

a) Portion: Solchah (Acts), Rome, 1st & 2nd Corinthians leh Galatia hi pha akisan ahi.

b) Form man le examination date:

Form man Rs 50/- hiding chuleh Exam nikho ding chu 16th October 2022 (Sunday) hiding.

Exam Timing: 10:30 am – 12:00 noon hiding ahi

c) Prize: Top 1 = Rs 15,000/- + Memento

Top 2 = Rs 10,000/- + Memento

Top 3 = Rs. 7,000/- + Memento

Top 4-10 Bible (leather cover) + Memento din pha akisai.

d) Question pattern: Multiple choice Question – 80 Marks,

Very short answer-10 marks

Fill up – 10 marks.

Chung'a hung kitah lang ho le tem na bang'a pan ina lah cheh diu vin Pakai min in tem na kahin cheh uve.

Pakai lengpi leija natoh khom piu

Rev. Lunkhosei Tuboi, Youth & Music Secretary, KBC (I)

EDUCATION DEPARTMENT

*Rev. Dr. Letthang Haokip
Secretary, Education Board*

Christian Edu. Column

PROGRESS REPORT (July-Sept. 2022).

1. Dr. Colvin Academy, Haolenphai Vilna le Thilpeh: Dt. 8th July, 2022 nikhon Dr. Colvin Haolenphai Vilna aga kineijin Printer khat Mr. Thangkhochon Haokip & family NGV a kon chu Rev Dr. M. Thongkhosei Haokip Gen. Secy. KBC Thensona anei in, chule ol in Desktop Computer khat Chavangphai Moreh C/Ch hole CEB member hapan najal in chohdoh ahitoh kilhon in Rev Thanglen Pastor KBC (15) thensona aneitoh lhon in Dt. 15th July, 2022 nichun pehdoh na ana kineitai.

2. Aishi School a dia mi ni (2) solding Hita: Dt. 24/7/2022 nin Pu Ngamkhai, CEB Chairman, Rev. Thongkholun Fin. Secy. KBC cheng in School toh kisai in Aishi a Village Authority chule CSO hotoh kimutona akinei in amaho ngaichat dungjui in khovei 2023 a ding in Jilkung ni (2) Aishi School a solbe a tutu a um Govt. LP School semhoijep nading tohgon akinei in ahi.

3. DCA Haolenphai Mopo athah Hita: Vangset umtah in Gollhang Jangminlen Vaiphei @ Boilen Vaiphei Former Principal Dr. Colvin Academy, Haolenphai in June, 2022 lhasung a einada lhah tah jeh uvin ama khel din Ms. Lhingpineng Sherlyn Khongsai chu Head-mistress din Dt. 22/7/2022 CEB Meeting nichun appointment peh anahitai. Chujongleh Hostel a Pasal khat ngaichat ahitoh kilhon in Gl. Ts. Paobul Haokip Hostel Warden Cum Teacher dinga appoint akibol toh kilhon in Dt 28/7/2022 nikho chun Dr. Colvin mun ah agaki thah lut tan ahi.

4. DCA, Phaicham Veng Felicitation Program Anakimang: Dr. Colvin Academy in 2021 HSLC examination kibolna a mi 23 in Let-ters Mark anamun kipapi aum lheh in ahi hijeh chun Dt 29/7/2022 nichun Felicitation program thupi tah in anakibol peh in ahi . Hiche a chun Pu Ngamkhai Charman CEB, Rev Hemkholun Member CEB chule Rev Dr. Letkthothang Haokip Secy. Education Board chenghi agakipang in ahi



5. DCA, Haolenphai a ding a Residential School Tohgon: Dr. Colvin School hi Government lang a kon a residential School bolna theiding aum e tia Rev Letlal Haokip (Delhi) Liason Officer, KBC in ahinsei toh kilhon in hiche tohgonhi akipan tan ahi. Government lang a kon a spot enquiry angaitoh kilhon in Dt. 14/8/2022 nichun Pu Rajendro Liason Officer Planning Govt. Of Manipur chu Pu Ngamkhai Chairman CEB toh amun vetpihna agakinei jin ahi. Tutu a hi aman Concept Note ajih laitah ahi ahung sodoh theina din Houbung mipi ten itao nauvah geh doh jing uhite.

GOVERNMENT LEGAL DOCUMENTS KINEIHO:

1. Dr. Colvin Academy: Obtained NGO DARPAN Regd. No 124 (A) of 2016 Under Manipur Society Registration Act 1989 (Manipur Act 1 of 2090)

2. Dr. Colvin Academy: Obtained FORM NO. 10 AC (TAX EXEMPTION) (Registration No. AAGAD9456QF2021801).

3. Kanggui Christian College: Included under Section 2(f) &12B of the UGC Act. 1956. the College , being a self-financing and Un-aided, would be eligible to receive UGC's Grant/support only in respect of Teachers and Students related schemes as per the decision of the commission dated 8th July 2011.

Natoh khompiu Keima,

Rev Dr. Letkhothang Haokip, Education Secretay, KBC

Kanggui Christian College vilna



Dt. 5th August, 2022 ni a Christian Education Board hon Kanggui Christian College vil na limlah ahi. (L to R) Rev. Letlal Haokip Liason Officer KBC, Rev. Dr. Thongkhosei Ha-

okip GS KBC, Rev. Dr. Letkhothang Haokip Edn. Secy. KBC, Pu Doulet Khongsai Principal KCC & Prof. Ngamkhokhai Mate Chairman TEB.

92nd EXECUTIVE COUNCIL
KUKI BAPTIST CONVENTION
CENTRE CHURCH, NATIONAL GAMES VILLAGE
17th August, 2022 (Wednesday)

LOLHING TAH'A ANA KICHAITA

Pathen lungset le puihoina jal a KBC houbung jouse mun chom chom a konin, 92nd KBC Executive Council, C/C NGV, KBC No. 1 mun a dingin pontho tah in houbung lamkai, department lamkai, worker ho, secretary ho ahung kalsong un Pathen thangvahna ipeuve.

Nidan 7:00 am chat in Council members ho ahung vailhung uvin kellap an (breakfast) akine khom in chujouvin KBC Central Choir ho lamkai na in vahchoi laa "Pathen Nangma Houbung Mite" aki-sa khom in Rev. Tonglet, President, KBC (I) in Pathen thutheng Psalms 118:5 simphong na aneiin chutoh lhonin ahung kikhom Council member jouse lemna anei toh lhon in KBC ponlap chu APA ACHA chule LHAGAO THENG PATHEN min in khaidoh na anei tai. Chujouvin Central Choir hon KBC LAPI asauvin Council Session kiman chah nading in mipi jouse houinn akijon tai. Session kipat tohlhon in Dr. M. Thongkhosei Haokip, General Secretary in Council member jouse min kouna anei in chutoh kilhon in Rev. Tonglet Haokip, President, KBC (I) leh Pu Zamkholal Zou, Vice President, KBC (I) in atouna lhon alo tai, Rev. Ngamjapao Haokip, Ex- GS in kipat na taona amang in Council Session I chu nidan 08:00 -11:00 AM sunga akinei khom in ahi.

Jing an (Lunch mipi in akine khom in nekhkhomna akichai chai in Council Session II nidan 12:00 - 2:30 PM sunga akinei khom in ahi.

Council Session teni sunga ana kiseidoh ho chu ahile KBC Event Calendar 2023 phatsahna, 70th KBC General Assembly, Mulam Baptist Church, KBC 19 a um ta ding, 2023 kumlhun lam a Khoppi (Pentannial Fellowship) neina dinga budget kigotna, Mr Thangjakhup Touthang, Pastor, KWSH licentiate bol ding ,Chi-



kim Village, Moreh le Haolenphai Centre Church dinmun kipe, Pastor Letkhoson resignation seichaina, Missionaries & Evangelists Retreat @ Guwahati, Workers Gowns & Clerical Shirt (Uniformity), Auditors Reports (kum kim) ,Worker phabep temporary appointment transfer/posting kibol ho:

- a. Rev. Dr Letkthothang Haokip, Education Secretary
- b. Pastor Khupjoyful Singson, Pastor, Centre Church L. Gamnomjang
- c. Pastor Jangkhothang Kipgen, Pastor, Gambih No. 25
- d. Pastor Paolam Kipgen, Pastor, Gambih No. 7
- e. Ms Sherlyn, Head Mistress, DCA, Haolenphai, agomlam a hichengho hi ahi.

Phat chaina in Rev. Dr. M. Thongkhosei Haokip, General Secretary in Centre Church, National Games Village, KBC No. 1 houbung hon host abol nachung uva pachatna sang tah anei in chuleh ahung kikhom Council member ho jouse toh C/C NGV houbung ho chung in kipa thu anasei in ahi.Council Session akichai toh lhon in in Rev. ST Onmang Haokip, Retd Pastor in taona amang in ahi. Kikhop khomna akichai chai in ponlap khailhah na kin akinei jin, Pu Zamkhol Zou, Vice President, KBC (I) in 92nd Executive Council khumkha ahitai tin phondoh naleh ponlap khailhah na anei toh lhon in damsellin KBC 92nd Executive Council lolhing tah'a chai ahitai.



EDUCATION SECRETARY THAH



Education Department Secretary phat chomkhat a ding a incharge ana po Pu General Secretary akon in Rev. Letthang Haokip in athah a Education Department a ding in mopohna lhingset 1st July 2022 nikhoa pat a poding in kikhut sanna ana neitan ahi.

OFFICE LEH GAMBIH THULHUT HO

Thulhut ho

Nisim 14/8/22 Sunday, T. Tuisomjang Baptist Church pasal khat, Moldenphai Baptist Church pasal khat, chule Old Tuisomjang Baptist Church pasal khat agom ma mithum in gambih pastor Rev. T Thangkhomang Haokip khut a Pa



Pathen, Chapa Pathen chule Lhagaotheng Pathen min in Twilut na ana nei tauvin ahi, pathen in gollhang mi thum ho tonsot in kilhon pi jing tau hen.

Rev. T. Thangkhomang Haokip Pastor KBC No. 16

TAHSAN THAH HETTOHSAHNA

Achesa nisim 7th August (Lhajing) 2022, Sunday nikho ni-hin Mongpijang Baptist Church akon Pathen goupeh chate,



naote mi 13 akon tahsan thah hettohsahna tuilutna kin lolhing tah in Rev. Tingoulen Haokip, Pastor KBC No. 23 khut a ana um in ahi. Pathenin houbung sung phatthei bohjing jeng tachen, Amen.

Rev. Tingoulen Haokip, Pastor, KBC No.23.

Molpi Baptist Church, KBC 20 NUTE ANNGOL TAO



Nisim 8 July 2022, KBC Gambih 20, women Department kingon na noiya nikhat angol taona chu lholhing tah in Molpi Baptist Church a ana kimangin ahi. Pakai heng a kile kit taohite Kala 3:40 thupi mangcha in Gambih Pastor in houlimna anaeiyin tao na chu abih bihin anache Iha in ahi.

Speakers:

- Rev. Ontho Haokip
- Mr. D. Samson Chapa
- R. Iqbalhossain
- Evan, Pretty Kippen
- Ms. Sheryl Khongai
- Mrs. David Dugli

Topics

- Salvation
- Mental Health
- Dating & marriage
- Substance abuse
- Impacts of social media
- Peer pressure
- Witnessing Christ 24x7
- Choosing Career

Objectives:

1. Lead them to Christ
2. Lead them to obey their parents
3. Lead them to have a close intimacy with God
4. Help them to submit themselves to Christ
5. Help them to follow God
6. Help them to explore their talents for God
7. Help them grow in the knowledge of God
8. Help them to live an exemplary life
9. Help them know that they are God's servant's children
10. Build moral character in them
11. Motivate them to have purposeful life
12. To instill a strong knowledge of biblical truth
13. Prepare them for a lifelong walk with God

EVENTS

MEITHAI TE NIKHO



August 18 to 22, 2022 sung in Evan Chingboi , Miss Lhingboi leh GI Satgin in Gambih no. 17 tour aga kibol in ahi. Centre Church Chassad, Lakhan, Molvailup, Kultuh leh Aishi houbung ho vilna akinei jin

Houbung mi ho toh nom tah leh kipah tah in kiman khomna jong akinei jin ahi. Meithai Nikho in jong Kultuh, Molvailup chuleh Aishi Houbung 3 ho a kiman khomna akinei jin ahi.



Tuni 21 August Sunday nikho ni in KBC Centre church houbung mun a MEITHAI TE NIKHO houbung in meithai ho gelkhoh na, ngailutna, le taopeh na in ana kimang in ahi. Jingkah lam in Church Pastor Rev. Henkhomang Tuboi in thupi sei na leh Meithai ho taopeh na aneyin ahi. Houbung sunga hi meithai mi 74 aum in amaho cheng jong kaikhomna a thakhat tah in pan alacheh uvin ahi. Nilhah in Pu DP. Haokip in Thupi sein aneyin meithai hole pagong jouse thilpeh sum mikhatna Rs. 500/- cheh in kithopi na aneyin ahi.

Khopijang Baptist Church Hou-in lutna



Dec. 19 2010 chun Kho leh Houbung anakitung doh pan in, Kum 4 sung a ahin sah u Hou-in thah hi Aug 6, 2022 nin Gambih Pastor Rev. Onthang Haokip in Kot hon na leh Pathen min a lhandohna ana neitan ahi. Chuleh kilom tah in Convention lang a lamkai President leh General Secretary chule Women lang a lamkaihon aga op un ahi.

STS site at L Gamnomjang



Visit of Shalom Theological Seminary site at L Gamnomjang Churachandpur on 11 Aug. 2022 by TEB Board members, Finance & Property representatives, Convention Representatives. Followed by handling over a sum of Rs. 5 Lakh to S. Lalboi Chief as an advance payment towards the cost of STS sites.



DR. COLVIN ACADEMY, MOREH

GOLDEN JUBILEE CELEBRATION

On : 7th October, 2022 (Friday)



Theme : "The Lord has done great things for us.." Ps.126:3

CHIEF GUEST:
PU LETPAD HAOKIP
HON'BLE MINISTER DA & BILLS / HORTI
 & SOIL CONSERVATION DEPT. OF MANIPUR

GUEST OF HONOR:
PU LHUKHOSEI ZOU
FORMER CHAIRMAN, NCC CHANGEL

FUNCTIONAL PRESIDENT:
REV TONGLET HAOKIP
PRESIDENT KBC INDIA

DEDICATION MINISTER:
REV DR M THONGKHOSEI HAOKIP
GENERAL SECRETARY, KBC INDIA



Chakpi molbem KBC 21 a Haosa pu Pu Tonglet Haokip in agam mite Taona mun ding a ana pehdoh chu Pu Doula Mangte Gambih Chairman pu in JCB ahin todoh kit a lampi ding semina chu 10 Aug 22, nikhoa ana kipan doh ahitai, Mission Board in jong vilna aga nei u ahi.



KBC Gambih 7 New Keithelmanbi Area a Gambih Pastor, Pastor Paolam Kipgen Convention nisim 20 August 2022 nikho chun agathah un gambih lamkai hotoh thanom tah a Pakai lenggam a tongkhom ding in tilkhouna aga neitaovin ahi.

Post Regd. MNP/81
Regd. No. 18134/88

92nd
KBC
Executive Council 2022
PHOTOS



Vice President
Pu Zamlai Zou in KBC
Ponlap khailhahna
ana neiton ahi



If undelivered, Please return to
The Editor, KBCThuso
Kula Baptist Convention
Opp. DM College, Imphal - 795001
Contact : 9862633173